

Nagins mandats lucrativs per anteriurs cussegliers federals

■ (anr/ld) La cumissiun d'instituziuns politicas pretenda che commembers dal cussegl federal che han demissiunà duain respectar in termin da carenza da dus onns avant che surpiagliar mandats lucrativs en il sector da l'economia.


Il stausch tar quella intervenziun ha dà l'anterior cusseglier federal *Moritz Leuenberger*, dentant er funcziunaris superiurs. Curt suenter sia demissiun è entrà Leuenberger en il cussegl d'administraziun da l'interpresa da construcziun «Implenia». Quest pass – pauc ponderà – ha provocà diversas reacziuns negativas. Tals mandats en societads da chapital sutmineschjan la confidenza e l'indipendenza da la suprema regenza. Ord quests motifs ha la cumissiun dal cussegl naziunal formulà ina proposta che vul scumandar ad anteriurs commembers dal cussegl federal da s'engaschar en interpresas privatas. La lescha vul impedir che anteriurs cussegliers federals possian profitar da lur enconuschientschas internas e da procurar ad instituziuns economicas privatas per avantatgs. Questas restricziuns duain er vegnir applitgadas per il cader superiur da la confederaziun che ha la cumpetenza da preparar contracts da la-

vur per interpresas privatas. Il cussegl federal ed ina minoritad da la cumissiun proponan da refusar il scumond.

En la debatta ha il president da la cumissiun *Rudolf Joder* (pps/BE) fatg attent a la gronda confidenza che giardia il cussegl federal tar il pievel. Questa credibladad stoppia vegnir mantegnida, han divers pledaders accentuà. Suenter la demissiun retira in commember dal cussegl federal ina pensiun da passa 200 000 francs.

Corina Casanova, la chanceliera federala, preschenta la posiziun dal cussegl federal e fa attent a noss sistem da milissa che saja sa cumprovà. En noss sistem saja usità ina midada da la professiun en la politica e da la politica returnar en la professiun. Questa pussaivladad stoppia restar, er per il cader superiur. Tut tenor la situaziun lubescha il dretg da personal a la confederaziun d'integrar en cas da demissiun ina clausula per impedir conflicts d'interess.

Sco emprima chombra è entrà en la materia il cussegl naziunal cun 99 cunter 81 vuschs. El ha dentant refusà d'aplitgar questa lescha er per funcziunaris. Ussato er il cussegl dals chantuns s'occupar cun la fatschenta.



In dals motifs per quella intervenziun è stà l'anterior cusseglier federal *Moritz Leuenberger* ch'è entrà curt suenter sia demissiun en il cussegl d'administraziun da l'interpresa da construcziun «Implenia».